



琴軒集



【明】陈珪著

琴軒集

(附杨宝霖辑佚)

重刻琴軒集卷第六

七言古詩

徐太守雪梅爲副都御史周公銓賦

昔人畫梅誰最奇，獨數花光與補之。二人去後幾百載，至今聲譽猶昭而當塗。太守清江彥，能與梅花寫生面。呵筆方驚冰在毫，臨池又覺香浮硯。朔吹號寒凍未消，琅玕石上粲瓊瑤。雪盈老幹昭奇節，陽動孤根長氣條。南枝幾朶先春白，不比羣芳後時發。生來原自有精神，老去猶能存骨格。玉堂茅舍咸相宜，風

塵不染冰霜姿聲名已居三友行香影豈負逋仙詩內臺使君
事高潔耿耿襟懷凜冰雪賦咏欣同水部何披圖靜對心怡悅

龍洲書舍爲僉都御史張公純賦

荆南風氣原清淑江水西來出巴蜀龍洲乃在江中央喬木千
章藹晴綠聞道君家在此居經籍收來萬卷餘漆書字古見蝌
蚪芸草香清落蝨魚藏脩偏宜地幽寂輪蹄不來苔蘚碧謫仙
昔日愛匡山范子當年住長白何如龍洲景最奇風來新水生
文漪豈惟淨淥可滌硯政要臨清堪賦詩長年讀書不出戶六

籍流觀自朝暮孔顏樂處信能尋濂洛微言應蚤悟一朝擢桂
步青雲廷對才華迥出羣科名已聽聞 當宁竹素還期紀異
勳乘驄衣繡時巡歷總說襟懷似冰蘖榮陞都憲振臺綱報國
常存寸心赤自號龍洲知幾春書舍年來入夢頻此日應償讀
書志清風擬紹古名臣

送陳頤菴上四川省墓

列聖相承崇孝治卹典之加及勳貴 恩頒命數原自殊鳳誥
龍章日星麗勳臣今重平江公一心報 國存精忠錦城舊日

開戎衛先隴峩峩馬鬣封先隴睽違越年歲引領西南獨獻欷
陰森宰木今已拱幾度孫枝長新翠君爲公嗣真寧馨代行展
省攄孝誠墓題嘉贈夫人號碑刻中朝太史銘聞說佳城地尤
吉聚氣藏風固難得鍾奇毓秀永無窮門戶光華應今日公之
勳德誠可嘉君之義氣還堪誇他年定有如椽筆爲表淮西忠
孝家

百雀圖爲余通政可才賦

礪礪坡前冬雪晴琅玕竹外梅梢橫曉來羣雀喜翔集或鬪或

啄兼和鳴其中一鳥與衆異潔白翎毛雪霜似長養初蒙卵翼
恩冲飛原有雲霄志伊誰筆法妙入神縑素寫來能迫真况兼
景物更奇絕生意滿前誠可人良工舊說黃筌輩孰玩斯圖亦
云最寶繪之堂迹已陳對此令人增慷慨

徐太守雪梅爲巡撫江西侍郎趙公新賦

黃堂太守畫最奇愛寫寒梅雪裏姿繁花綻玉暗香動老幹屈
鐵蒼苔滋任教玉笛吹夜月自有春意生南枝肯隨桃李媚時
俗素與松竹同襟期精神何慙仁老筆香影不負逋仙詩魁名

已在百花上金鼎調羹當有時

題趙雪松畫洛神及寫洛神賦

繫思王入覲東歸今日嚴飭其徒御道伊闕與景山兮瞻鸞旌
之飛度遇宓妃於洛川兮縹緲隔乎烟霧倏飄忽其若神兮見
凌波之微步從湘濱漢臯之神女兮儼衆靈之來聚采明珠而
拾翠羽兮紛雜遯而容與雖眷眷於淑美兮將奚以達乎哀素
臨川流而凝佇兮嗟幽冥之異路偶瓊璫之來獻兮豈徽音之
能悟耿良宵而忘寐兮遂悵然而歸去念此事之莫稽兮所可

重者思王之賦覽松雪之圖寫兮覺神怡而目注歷百禩而如
新兮誠在人之珍護聊肆玩以自適兮又奚用深究乎其故

趙文敏公繪洛神像寫思王賦其字與畫爲世所重今爲
車駕司員外吳興俞君用賓所藏間謁予言因賦此歸之
時正統三年也

蘭翠軒爲陳廷璋賦

彼嫩人兮貌清揚開軒適近茗溪傍依稀輞川之風景恍惚浣
花之草堂雨過娟娟脩竹淨風來馥馥崇蘭香時看霏翠落虛

季華集 卷六
四
三〇〇
牖或見水氣生寒光終朝相對塵慮息如遊九畹浮三湘神閑
氣和樂自然飛夢不到名利場謝家蘭玉信堪擬蔣氏三徑還
可方累世相承在詩禮應是前人慶澤長

山水圖爲褚嗣良賦

昔分符竹知永陽居民樂業歌時康環滁况復好風景醒心豐
樂曾尚羊追遊僚友總文雅紫薇泉上同飛觴幽谷朝來雲氣
白瑯琊雨晴山色蒼樹藏古刹暝烟合花落三湖春水香龍蟠
菱溪號名勝林下今誰開草堂別來俄驚十四載空有遺愛留

甘棠興來閑寫舊遊景褚生得之喜欲狂裝潢成軸索題詠新
詩賦就情何長江雲淮樹恒在目還憶歐公舊醉鄉

聚星堂

句曲之墟有陳氏詩禮相承敦孝義高堂華扁名聚星先世相
傳太丘喬憶昔荀氏稱八龍元方兄弟能與同二家子弟總英
特致令列宿昭蒼穹盛事流傳千百載此堂之名恒不改西掖
文光貫斗牛德星午夜聯輝采

華陽道隱爲羅濟能賦

三茅之山仙所都華陽洞在山之隅丹房藥室秘靈異洞天之名誠不虛彼媿人兮學仙徒卜築近愛華陽居當門列岫耀珪璧滿地白石堆琪玕杜門少與塵事接終日閑觀鴻寶書或時採芝度溪谷或時招鶴來庭除興闌高臥北窓下松門瑟瑟鳴笙竽喚醒十載江湖夢長嘯一聲山月孤

襄城伯李公桃花馬歌

四平諸孫今總戎愛馬喜得桃花驄首如渴烏豎兩耳目猶來鏡明雙腫肉駿礪礪汗流赭滿月點作胭脂紅飽食常懷玉山

下顧影尚憶瑤池中有時驕嘶似矜寵頓令庭院皆春風紫燕
赤驃乃其亞一出能令冀北空總戎報國存精忠况有神駿
來遭逢雲臺勳業立可致不讓當年衛霍功

題方壺畫

龍虎仙山在何處玄館琳宮鎖烟霧人簡昨夜風雨過瑤草瓊
芝長無數金門羽客方方壺早年曾在山中居身如野鶴無定
着心與浮雲同卷舒平生喜作南宮畫醉墨淋漓恣揮灑峯巒
遠近分淡濃筆意神奇多變化斯圖自信超凡流眼前景致清

而幽樹昏似覺雲初起石潤應疑雨乍收神樂道人能鑒識得此寶之猶重璧方壺仙去已多年龍虎風光宛猶昔

送鑿官陳義成之任

太丘聞孫忠孝俱平生喜讀軒岐書鑿人每收十全效種杏已成千百株今年被薦來京國新授鑿官承寵渥縉紳祖餞出都門別酒香凝金錯落潞河雪霽冰澌流好風催發沙棠舟南經鉄甕趨吳郡東度錢塘望處州栝蒼山色青無數歸馬能諳舊行路懸知三月到家時細雨落花春已暮

孟浩然圖爲工部鄭侍郎辰賦

灞橋雨雪初霽時策蹇近自都城來飄蕭烏帽任風欺攜琴童子能相隨平生隱操人所知不意何事遊京師鹿門山色空參差襄陽耆舊今有誰苕溪錢君筆法奇寫出當日風流姿郢州刺史亭久隳丹青誰復如王維

五老聽松歌爲嚴貢士賦

我昔扁舟泛彭蠡五老峯巒望中起興來飛步上層巔萬壑松聲聒人耳清如綠綺調冰絃潺潺石澗鳴寒泉和如洞庭張廣

樂珊珊環珮來羣仙雄如昆陽破勁敵鉄騎奔騰響金革壯如
錢塘八月潮巨浪洪濤互衝激須臾聽罷風已停千林萬樹寂
無聲此時塵慮若冰釋一段襟懷如水清媿人家住匡山麓飽
聽松濤響巖谷自從折桂上青雲歸夢時時到書屋妙齡勳業
宜勉之晝錦榮歸應可期山中猿鶴擬相候還聽松聲似舊時

題馮寺丞所藏李眠九歌圖

紅雲輝輝昭玉宇紫宮之中神獨處
大小司命播洪鈞萬彙生成咸得所
扶桑霞明天欲曙龍輶東來從真侶
凝情遙睇雲中

君烟水微茫隔洲渚，湘靈瑤瑟久不聞。山鬼啾啾啼夜雨，國殤
沉淪河伯逝，誰致蘭麝薦芳醑。繫昔三閭心獨苦，託此微詞期
悟主。魚腹幽魂不可招，九歌聞來轉淒楚。區區忠誠孰能識，紫
陽辨之深見許。龍眠居士畫更精，想像寫來寧有譜。風環月珮
鏘琳瑯，翠輦鸞旌擁于羽。天狼無光殪狐矢，白鼉騰波神物舉。
杜衡青青蘭芷馨，遺珮何人恣容與。辛夷之車山下來，赤豹文
狸導雄虎。陰陽鬼神紛雜揉，祭賽相傳楚風土。笙簫鐘鼓間琴
瑟，巫能安歌覲能舞。千年往事似足稽，景象恍如親所覩。信知